

## 2 Korinti

*Paulo Yesugât hoŋ manminep.*

<sup>1</sup> O galalupne, nâ Paulo akto galanenŋe Timoteo kulem esenŋe ire Anutugât luâk âmbâle Korinti kepian mandâi yeŋgât kulemgoet. Ye kulem esenŋe ire oyaŋmâ metem âmâ Anutugât luâk âmbâle Akaia hânân mandâi are yeŋgimbiâ oyaŋbai. Akto nâmâ Yesu Kristogât hoŋ bawa aregât aposologât âi Anutuŋe makmâ katnegep.

<sup>2</sup> Ewenenŋe Anutu akto Humonenŋe Yesu Kristo yâkŋe biwiyenŋe yâkgâlân kali are biwiyenŋe sândugeâkgât wâtŋe akyenŋim damunyenŋe agetgât ulilaŋdân.

<sup>3</sup> Nen Anutu Humonenŋe Yesu Kristogât Eweŋe yâkgât kotŋe mem agatbaen. Yâkŋe damunnenŋe akto biwinenŋe sândugemap. Akto okot nâŋgâ nengimap. Akto biwinenŋe mem sândukŋe ketugumap.

<sup>4</sup> Hain akmâ hâk hilâlâm keiŋe keiŋe mem limbâpnengumap. Akto Anutuŋe mem limbâpnengumapgât limbâp arekŋe nen hain agâk gala bikŋe hâk hilâlâm keiŋe keiŋe kâlegen manbiâ âlepŋe mem limbâpyenŋuwaen.

<sup>5</sup> Akto Kristo nengât hâk hilâlâm nâŋgâep hainâk yâkgât âi memaen aregât hâk hilâlâm dondâ nâŋgâmaen. Hain akmâ âmâ benŋe Kristogât akmâ wâtŋe miawaknengimbo biwinenŋe sândugembo umatŋe are lokomaen.

<sup>6</sup> Galama, nengâlân umatŋe miawakmap arekŋe âmâ ye biwi sânduk miawagâkgât miawak-nengimap. Dâ biwi sânduk miawaknengimap are gai yengât akmâ miawaknengimap. Aregât biwi sânduk nengâlân miawagep arekŋe yengâlân hâtikom tânyengumbo benŋe umatŋe nengâlân miawakmap a hainâgâk yengâlân miawakto amâ hâk hilâlâmŋe biwi sânduk nângânetgât miawaknengimap akto ye gai miawakyengimap.

<sup>7</sup> Aregât nen yengât hanoko bo akmâ hin nângâmaen. Hâk hilâlâmngât umatŋân nen manmaen ye gai manmai aregât Anutuŋe biwinenŋe mem yeugenengimbo biwinenŋe sândugemap ye gai yeugeyengimbo biwiyenŋe sândugemap a nângâm kârigemaen.

*Kembuŋe Pauloma umatŋânba mem olonŋegep.*

<sup>8</sup> O galalupne, nen Asia hânân hâk hilâlâm kakŋân manmâ gayion aregât pâpkowâigât makyengire nângânet. Nen Asia hânân mandenŋe umatŋe dondânande mem ge kat nenegep. Akto arekŋe nengât kârikŋe are ewangimbo wâtnenŋe gembo nen âmâ mombaen me gain o dâm nângâyion.

<sup>9</sup> Akto ire emelâk momogât pat akten dâm hannenŋaet kârikŋe are hulaŋep. Are âmâ yân bo miawaknengiep. Nen nennŋaet kârikŋe nângâenŋe gembo Anutu momoŋe mem golâ katyekmap yâk konok nânganmâ tânnenguwen dâm ulilaŋnegât are miawaknengiep.

<sup>10</sup> Umatŋe bâleŋe miawak nengimbo momberâm aktenŋe ainâk tân nengumbo bo agep. Aregât hâmbâi gai umatŋe siâ miawakto

tân nengumbo bo akbiap aregât keiŋe nâŋgâenŋe biwinenŋe sândugewiâp.

<sup>11</sup> Akto yekâ hainâk nengât Anutu ulilanbei. Hain akbiâ âmâ Anutuŋe den nenŋe dondâ are nâŋgâm wâtŋe aknengimbo aregât ulit dondâgât den pat sambelembo Yesugât kâmot hânŋe hânŋe manmai arekŋe den are nâŋgâm Anutu mepaiŋe mem agatbai. Are bunŋe agâkgât Anutu nengât ulilanbei.

*Pauloŋe Korinti gâtŋe bo heyenŋiep.*

<sup>12</sup> O galalupne, nen wangât nâŋgâm heronŋe akmaen? Hin. Nenŋe luâk âmbâle hânŋe hânŋe manmai akto Korinti yenŋât dewunyenân agak meme âlepŋeâk mem manmaen aregât heronŋe akmaen. Dâ areâk bo. Anutuŋe okot nâŋgâ nengiepgât hâkgât nâŋgâ nâŋgâ are bo nâŋgâm âmâ agak meme âlepŋe akmâ Anutuŋe damun nenŋe akmap aregât biwinennân ârândânâk mem manmâ okot âlep akmâ tân yenŋumaen. Aregât nâŋgâm heronŋe dondâ akmaen.

<sup>13</sup> Akto den yenŋât kulemgoyion keiŋe amâ bo heambukmâ tatâp aregât hin nâŋgâre humo aktâp.

<sup>14</sup> Nengât keinenŋe bikŋeâk nâŋgâi gârâmâ Humonenŋe Yesu are lâuwânŋe purikato nen manman âlepŋân manbaengât heronŋe akmâ manbeigât nâŋgâm heŋgemgowe. Akto nenâkâ hainâk ye heronŋe akmâ manbaigât nâŋgâm heronŋe akten.

<sup>15</sup> Akto yenŋe Anutugâlân biwiyenŋe kali akto siân biwiyenŋe hainâk kinbiapgât are nâŋgâm aregât yekberâm agân.

<sup>16</sup> Akto ulikŋân Makedonia hânân ariwerâm ain hin nâŋgân. Nâ Makedonia dâwân ariwerâm getek

kepia Korinti ain âgâm Yesugât kâmot yekbian. Yekmâ arewa Makedonia hânân ariwian. Nâ ain âgâm Yesugâlân gâtne yekmâ ainba purik katbian âmâ hainâk ulikñân nekmâ herone agi hainâk nekmâ herone akbaigât nângâm yektere Yudaia hângât dâp ain katnekbai hain nângân.

<sup>17</sup> Akto hain nângâm benne wangât bo togom yegân? Ye aregât hin dâyi, “Paulo amâ ikinjaet nângâ nângâne watmap. Akto den han lâuwân makmap.” hain dâyi. Amâ hiangiyi.

<sup>18</sup> Dâ aregât keine makyengire nângânet. Anutune han lâuwâ bo akmap yâk den bunne makmap. Aregât nen gai yengât han lâuwâ bo akmâ den bunne makmaen aregât wan me wangât makmâ âmâ hainâk memaen.

<sup>19</sup> Dâ areâk bo. Yesu Kristo Anutugât nanne yâkgât den ulikñân nâ akto Sila akto Timoteo nenne makyengiyion. Hin me hain mon? dâm bo makyengimaen. Bo. Kristogât akmâ bundâk dâmaen.

<sup>20</sup> Akto hainâk Anutune wan me wan nengât kârikne ketugu nengiwiapgât dâm herone are wan me wan Yesune miepgât miawak nengiwiap. Aregât nen Yesugât kâmolân gâtne Anutune magep are kârikne agep aregât kotne mem agatmaen.

<sup>21</sup> Galalupne, Anutu konokne ikinje âi nengiep ye akto nen hârok Kristogât akmâ nen Anutune menenekmâ kârikne ketugu nenekmap.

<sup>22</sup> Hain akmâ nângât kâmot nângâ ninjet dâm ikinjaet Heakne hungun ando tirip kat nengimbo nen hin nângâmaen. Anutugât Heak âlepne arekne kautnennân menenekto nângâen aregât wan me wan nengât dâm hâriep are siân bunewâk miawak

nengiwiap aregât nângâen.

<sup>23</sup> Galama, nâ wangât bo togom yegân aregât lâuwâne makbe. Uliknân yekberâm akmâ hin nângân. Nâ hinne arim âmâ Korinti gâtne yekmâ bâlene agi are den kom miwindik yekbiangât umatne miawak yenngiwiap. Are miawakbopgât hinne ain bo ariwiangât nângân. Yu maktân are Anutu ne nângâm bunne dâp.

<sup>24</sup> Gârâmâ nenne nângâ nângâyene kom miwindik yekbaen âmâ ainâk hâknenne bo mem agatbaen. Dâ yene biwiyene Yesugâlân kali aregât herone akbai dâm aregât mem kârikne ketugu yekmaen.

## 2

*Paulone Korinti kepien bo purikalep aregât keine magep.*

<sup>1</sup> Akto biwinânâk âmâ hin nângân. Uliknân Korinti kepien arim makyengire umatne miawakyenngiep. Are lâuwâne miawakbopgât aregen hinne bo ariwian.

<sup>2</sup> Ariwian âmâ galalupne okot âlep ninmai are kambiamyene bâliwopgât hinne bo ariwian. Ye bâlimbiâ âmâ nâ gain akbian? Hain nângâm aregât bo togom yegân.

<sup>3</sup> Gârâmâ siân togowian dâm ain galalupne yene okot âlep akmâ agak meme âlepne akmâ tân nugumai dâm kulem esenne kulemgom katere togombo emelâk oyanj. Kulemgom ain âmâ yene nângât akmâ herone akbaigât nângâm heנגemgoân.

<sup>4</sup> Akto kulem esenne kulemgoân sop ain âmâ hin nângân. Ye biwiyene umatne akmâ bâliwopgât

akto yengât okot nângâyengiman are nângânet dâm yengât akmâ tepne bâlimbo hâk hilâlâm owâine bo nângâ yengim kinmâ dewunne tune gembo indem kinmâ kulengoân.

*Galayene yâk yengât dosa hepunbei dâm magep.*

<sup>5</sup> Hain kulengoân gârâmâ dondâ maktere bâliwopgât getek makbe. Yengâlân gâtne siâne bâlene agep aregât nâ biwinân getek umatne miawakniņep. Amâ ye âmâ biwiyene umatne agâkgât mângiyengiep.

<sup>6</sup> Ye biwirâ mem miwindikmâ wan me wan agaņi are nângâre bo aktâp.

<sup>7</sup> Hinņe yâkgât dosa hepunmâ biwiņe mem sândukne ketugunet. Hain akbiâ luâk aregât biwiņe umatne arekne mem ge katbop.

<sup>8</sup> Aregât nâne goaņyektere luâk bâlene agep are yâkgât okot âlep are akmâ maņganņet.

<sup>9</sup> Akto kulem esenņe ulikņân kulengoân amâ ye dop yenguân. Ye âlepne nângât lau watmai me bo dâm kulemgore oyaņmâ lokom luâk bâlene are heņgemgoyi.

<sup>10-11</sup> Dâ hinņe laune lokom luâk aregât dosa hepunañbiâ nâkâ hainâk Niambi gulip akņet dâm mem ge kat nenekto aņun aņgiwâengât dosaņe hepunandân. Niambiņe Yesugât kâmot gulip akņet dâmap aregât keiņe nângâmaen. Aregât yengât akmâ Kristoņe nângâambo âlepne agâkgât luâk aregât dosaņe hepundân.

*Paulo Troa kepiān biwi umat miawaganep.*

<sup>12</sup> Galalupne, nâ hân siân siân ariân aregât keiņe makyenņire nângânet. Nâ ulikņân Troa kepiān âgân ain Humonenņe Kristo arekne meme

akniŋmâ luâk âmbâle dondâ meme akyeŋgimbo Kristo heŋgem nenguep aregât keiŋe nâŋgâwerâm nâŋgâlân togoyi.

<sup>13</sup> Hain akbiâ makyenŋiwerâm âmâ galane Tito are bo mem miawaktere biwine umatŋe akto bo makyenŋim âmâ hepun yekmâ Makedonia hânân ariân.

<sup>14</sup> Yoe, Anutuŋe Kristogât âi luâklupŋe nen buŋam kom mem miap pannenekmap. Hain aknengimbo pat âlep denŋaet higenŋe âlepŋe mem sambelienŋe liwalakmâ hân ârândânŋ arimap. Aregât mepai humo aganbaen.

<sup>15</sup> Nen Kristogât higen suk suk akmaen aregât luâk Anutuŋe heŋgemgo yekbiap are makyenŋienŋe manman âlepŋe miawakyenŋimap. Dâ luâk bikŋe makyenŋienŋe hilip agu agugât miawakyenŋimap.

<sup>16</sup> Hilip agu agugât ambolupŋe higenŋennŋande oloŋyekmâ momo higenŋe akmâ yeŋgimbo momai. Dâ manman âlepŋe aregât ambolupŋe oloŋyekmâ manman higenŋe akmâ ewum goaŋyekto manmai. Âi are amâ niŋande mendo ârândânŋ akbop?

<sup>17</sup> Luâk dondâ arim hanâk hanâk puligât ulityenŋim Anutugât den arim makyenŋimai nen dop hainâk bo akmaen. Nen âmâ biwinenŋe irakŋe akto Kristo olop biwinenŋe konok akto Anutugât dewunŋân kinmâ Anutugât den âlepŋe are makyenŋimaen. Aregât kârikŋe Anutuŋe nengimap aregât Anutugât mepaiŋe mem nâŋgâmaen.

*Anutugât hoŋ bawa yâk yeŋgât den pat.*

<sup>1</sup> Akto ya kulengoân are âmâ nâŋgât nâŋgâ nengimbiâ humo agâkgât kulengoân mon? Bo. Hinŋe luâk bikŋande âiyenŋe keiŋe ekmâ nâŋgâŋetgât kulem esenŋe kulemgoyi are mem hekat yeŋgiyi are nen âmâ hain bo akmaen. Nen âmâ kulem esenŋe siânŋe me yeŋe kulemgoyi are bo mem manmaen. Nengât âi siânbaŋe ekmâ nâŋgâŋetgât amâ ye agak meme âlepŋe memai are yeŋgât ekmâ nâŋgâmai.

<sup>2-3</sup> Akto kulem esenŋe aregât keiŋe den dopŋe siâ makbe. Luâk den keiŋe hekat nengimai arekŋe âi nenŋe âlepŋe are oyaŋmâ nâŋgâŋet dâm humomolupyenŋande kulem esenŋe kulemgom yeŋgimbiâ are mem arim makyenŋimai. Akto ye kulem esenŋe are oyaŋmai akto kulem esenŋân gâwu kulemgomai amâ yân. Akto nen hain bo akmaen. Nengât kulem esenŋe amâ yeŋe dop akmai are akto gâwu bo akto kulem esenŋe bo. Nen gâwu mem kulemgomaen dop hainâk Kristogât den makyenŋimaen akto kulem esenŋe kulemgomaen dop hainâk den makyenŋienŋe biwiyenŋân miawakmap. Akto Anutu manman kârikŋe ambonŋe arekŋe ikiŋe Heak âlepŋe huŋgun aŋdo han biwiyenŋe mendo agak meme siâ akmai aregât den pat luâk âmbâle dondâ yekmâ nengât âi keiŋe nâŋgâmai. Akto ulikŋân Mose âmâ den kârikŋe kâlân kulengoep amâ nen hain bo akmaen. Biwiyenŋân den nenŋande gembo agak memeyenŋe âlepŋe miawagep are amâ nengât kulem esenŋe hinare.

<sup>4</sup> Akto nen nâŋgâ aŋgienŋe humo aktâp amâ Kristogât akmâ Anutuŋe nenekto âlepŋe akmap.

<sup>5</sup> Amâ nenje nengât keinenje maktenje bunje miawakbiapgât kârikje bo tatnengimap. Dâ siâ me siâ mendenje âlepje akbiap amâ Anutuje meme wâtnenje nengimap hârok.

<sup>6</sup> Akto nengât âi amâ den areâk bo. Anutugât Heak âlepjande memene aknengimbo den pat âlepje makyengiennje manman âlepje miawak yengimap. Dâ den kârikje bunje mem arekje manman kârikje bo miawak yengimap. Dâ den kârikje nângâmbiâ Anutugât Heak âlepjande meme akyengimbo ain manman âlepjân manmai.

<sup>7</sup> Akto den kârikje aregât keije makyengire nângâjjet. Ulikjân Anutuje den kârikje kâlân kulengoep amâ momogât pat. Hain akto Moseje ekto kulemgom metembo kât are lokom gem Israe luâk âmbâle mem oloj yejep. Hain akto Anutuje den kulemgombo egep aregât enem dewunje pagalene akto Israe luâk âmbâlene Mosegât enem dewunje ekbiâ dewunyeje hilâlâm yengimbo bo egi. Gârâmâ pagalene are sopje sopje tatbiapgât dop bo.

<sup>8</sup> Aregât Anutugât Heak âlepje arekje wan me wan nengât miawaknengiwiap aregât pagalene kârikje âmâ humo dondâ yem âmâ bo boakbiap arekje âmâ den kârikje ewangimap.

<sup>9</sup> Are lâuwâne makbe. Den kârikje miawagep ainâk lokowaengât dop bo tatnengiâp. Aregât Anutuje den âiân katnenekbiapgât dâp miawagep. Dâ hinje Yesuje bâlene agion aregât dosanenje mendo Anutuje ye dosa luâk bo dâm nengonlep aregât pagalenjande den kârikjaet pagalene ewangimap.

10 Aregât ulikñân den kârikñe amâ pagaleñe kârikñe kilep amâ Yesuñe miawakto den kârikñe aregât pagaleñe bo agep.

11 Akto areâk bo. Moseñe den kârikñe pagaleñe yogan tatminep aregât kârikñe bo agep. Dâ Yesuñe nengât wan me wan miep amâ yoganne bo. Are pagaleñe bunñe akmâ yem âgâwiap aregât kârikñe humo akmâ tatmâ âgâwiap.

*Anutuñe pagaleñe nengimap.*

12 Yu kulemgoân are nâñgâm biwinenñe herone humo akmaen. Hain akmâ Anutuñe denân bo katnenekbiapgât den pat âlepñe kepiane kepiane hârok hamep bo akmâ makyengimaen.

13 Dâ ulikñân Mose ikinje enem dewunñe pagaleñe bo akberâm agep are Israe luâk âmbâleñe ekbâirâm ikinje enem dewunñe tigiep. Aregât dop nen hainâk bo akmaen.

14 Akto areâk bo. Ulikñân Yuda nengât hakulupnenñe Moseñe makyengimbo Israe luâk âmbâle ainâk biwiyenñe kârikñe akmâ katipñe katipyenguepgât den are bo nâñgâm henngemgoyi. Israe luâk âmbâle ulikñân hainâk akmâ gam gam yu miawaktâi ire amâ hainâk Mosegât den oyañmâ katipñe hainare katipyenguepgât bo nâñgâmai. Aregât katip are yân bo hulanj akbiap. Kristo konokñe mem hulanjbiap.

15 Israe luâk âmbâle Mosegât den keiñânbak oyañmâ bo nâñgâm amâ tatmâ gambiâ gambiâ yu miawaktâi yâk yengât hanyenñe katipñe olowâk akmaigât den bo nâñgâmai.

16 Hanyenñe purikatmâ kembu mete katbiâ arekñe katip are hulanjyengiwiap.

17 Akto Humonenne ikiye Heak Amboje kaut-nennân mendo owâinjân mendenne wan me wan âlepne miawaknengimap.

18 Akto areâk bo. Nen âmâ dewunnennân katip bâlâk akmâ Humonenjaet pagalene Heak kârikne are ekmâ kindenne ketugu nenekto ikiye towat miawaknengimbo manmâ manmâ âgâenne pagalenenne humo akmâ sambelem âgâmap. Are âmâ Heakgât kulem.

## 4

### *Anutugât pat âlepne amâ geâne bâlâk.*

1 Akto Yesugât den pat makyengimaen nen âmâ Anutune okot nângâ nengim âi ire nengiep. Anutune okot nângâ nengim âi ire nengiep aregât biwinenne bo bâliwiap.

2 Hain nângâm wan me wan bâlene are hami panmâ hâkâk akmaen. Akto hianjigât agak meme are hepunmâ Anutugât den are mem siâ siâ bo akmaen. Bo. Nenne den are oyanmâ keine wan me wan miawakto are hanâk tek tekjân makyengimaen. Hain akmâ Anutugât dewunnân kindenne huragumbo luâk âmbâle den pat bunne are hanâk hanâk makyengimaen are nenekmâ biwiyengân nângânengimbiâ ârândâj akmap.

3 Akto luâk âmbâle bikne are hememgât dopjân manmai arekne âmâ den nenne bo nângâmai.

4 Luâk âmbâle are amâ hân iregât damunne yoganne akmap arekne, pagalenân gâtne yâkgât den pat are nângâwâi dâm nângâ nângâylene gisap kombo dennenne bo nângâmai. Amâ den pat are âmâ Kristo Anutugât dopne akmâ pagalenân gâtne

yâkgât den nângâwâi dâm nângâ nângâyene gisap-komap.

<sup>5</sup> Akto nen âmâ nenjaet keinenje bo makyengimaen. Bo. Nen hin makmaen. Yesu Kristo amâ Humonenje dâmaen aregât nen âmâ yengât âi luâk manmaen.

<sup>6</sup> Akto Anutu ulikjân, “Hândâk kêlegen pagalene miawagâk.” dâmbo miawagep arekne han biwi nângâ nângânenje hulane akto hândâk kêlegen malion nen Kristogât enem dewunje ekmâ âmâ Anutugât pagalene a egion.

*Paulo umatje miawaganjo nângâmbo tânjât agep.*

<sup>7</sup> Nengât biwinennân den âlepne tatmap amâ umbâ hânne mângimai dop hainâk. Haingât nenje kêriknennân âi are bo mem manmaen. Anutugât kêrikneje kêrikne siâ hârok ewangimap are mem manmaen.

<sup>8</sup> Umatje miawak nengimap aregât keine amâ hin. Umatje are bikenba bikenba miawak nengimbo gain gain akmâ manbaen dâenne âmâ umatje arekne nen bo hilip nengumap. Akto umatje arekne nângâ nângânenje tigimbo han undup akmaen amâ nângâ nângânenje are dondâ bo bo akbiap.

<sup>9</sup> Luâkne wan me wan bâlene aknengimbiâ benje Anutune bo hepun nenekmap. Luâk bikjande nengumbiâ ge yemaen dâ amâ bo bâlimaen.

<sup>10</sup> Hilâm ârândân Yesune hâk hilâlâm nângâm moepgât tirip are mem manmaen gârâmâ Yesune ikinje manman âlepne nengimbo hâknenne hutuk âgâmbo âmâ bikjande nenekmâ Yesugât manmanje hâknennân ekmai.

11 Akto nen âmâ Yesugât âi memaen aregât Yesugât pat sambelem ariâk dâm aregât hâk hilâlâm nângâm bâsok momaen. Gârâmâ Yesuņe wâtņe aknengimbo manmaen are luâk âmbâleņe hârok ekņet dâm âi humo mem manmaen.

12 Aregât hin. Nengâlân âmâ momoņe âi menenekmap. Dâ yeņgâlân âmâ manman golâņe meyekmap.

13 Ulikņân Anutugât Heak âlepņe arekņe luâk siâ meme agaņdo kep keņgu siâ kulemgoep aregât bikņe hin, “Biwine Anutugâlân kalân arekņe hâwât neкто dowâk owâiņeâk makyeņgiwe.” hain kulemgoep. Akto nen hainâk Anutugât Heak âlepņe arekņe meme aknengim arekņe hâwât nenekto nâņgaņmâ dowâk owâiņeâk makyeņgimaen.

14 Akto nen âmâ wangât âi humo mem hâk hilâlâm nângâm hanâk dâm makyeņgimaen? Hingât. Anutuņe Humo momoņânba mem oloņdo agalep yâkņe âmâ nen akto ye hainâk oloņ nenekto agatenņe Yesu olop manmâ âgâwaen hain nâņgâmaen.

15 Anutugât han kalemņe sambelembo Anutugât mepaiņe mem manmaigât kâmot arekai sambelemap. Arekņe yeņgât akmâ miawakmap.

16 O galalupne, aregât siâkâ makbe. Umatņe miawak nengimap aregât keiņe yu kulemgoân arekņe hâknenņe mem ge katmap. Hain akto âmâ hanâk biwinenņe âmâ hilâm ârândâņ kârikņeâk kilâkgât Anutuņe tân nengumap.

17 Akto nengât umatņande amâ yogan owâiņe akto arekņe egâliarņ umatņe tatmâ kârikņe akmâ âgâwiap are nengimbo ârândâņâk tatnengimap.

<sup>18</sup> Aregât nen âmâ siâ me siâ hânân miawakmap are bo ekmâ manmaen. Bo. Siâ me siâ tiwâk yemap aregât eknerâm manmaen. Amâ wan me wan ekmaen are amâ yogan. Dâ bo ekmaen are âmâ kârikne tatmâ yembiâp aregât aregâlâk ekmâ âsim kinmâ manmaen.

## 5

### *Iren hân yogannân manmaen.*

<sup>1</sup> Nen hin nângâmaen. Hâknenne amâ hân uliginenne hainare tâmbâne ire torokto Anutuje himbimân emet kârikne siâ mem penianmâ nengiwiap emet are luâk bâtyenande bo mângiyi aregât kinmâ kârigem kinmap. Akto kinmâ âgâwiap.

<sup>2-3</sup> Akto nen hinne hâknenne ire mem meanmaengât hâkâne akmâ bâlâk kinbâengât indem manmâ âmâ hâknenne irakne aregât ukenne nângâm Anutugât dewunnân hâknenne irakne mem kinbaen aregât nângâenne biwinenne herone akto lâmgom manmaen.

<sup>4</sup> Hâknennaet uligiân manbaen ârândân tat tat urutenne ariâkgât manmaen yuyai olop manman are pandenne ariâkgât. Dâ hâk katipnenne tâmbâne kotgânegât bo aknengimap. Are yendoâk irakne lugum nengimbo geâkgât aknengiwiap gât nângâenne humo akmap. Aregât momogât pat agak are manmangât patnande kawulâkgât manmaen.

<sup>5</sup> Wan me wan âlepne miawaknengiâkgât mem umale aknengiep i are Anutuje hain aknengim dowâk Heak katnengim lugu nengiep.

<sup>6</sup> Hain nângâm nângâ nângânenne kârikneâk kinmâ âgâwaen. Akto nen hâknenne olop aregât

hânân manmaen amâ himbimân Humonenje olop boâk manden.

<sup>7</sup> Nen amâ Yesu nânğanmaen dâ wan me wan dewun nenje ekmaen are amâ bo nânğanmaen.

<sup>8</sup> Benje nen nânğâ nânğanenje kârikjeâk kinbaen. Akto hâk ire in hepunmâ âgâm amâ Humonenje olop manbaen dâenje biwinenje sândugemap.

<sup>9-10</sup> Akto nen hârok wan me wan hânân ire mendenje aregât Kristoje den makmâ kotgâ nenekbiapgât welam ginñân kinbaenân hâknenje olop hânân manmâ wan âlepje me bâleje meyiongât hâuje âlepje me bâleje nengiwiapgât manmaen amâ Kristogât kambiamje heroje agâkgât ikiye âi memaen. Akto mombaen sop ain amâ Yesugât kambiamje heroje agâkgât kotje mem agatbaen.

*Paulogât keije amâ hârokje nânğanji.*

<sup>11</sup> Akto Humonenjande hâuje bâleje me âlepje nengiwiapgât aregât hamep akmâ hanâk luâk âmbâle makyenjim hâwât yekmaen. Akto Anutuje wan dâep are hârok mendenje nenekmâ âlepje dâmap. Akto ye hainâk biwiyenân nânğâm bunje dâi me?

<sup>12</sup> Akto emelâk maktân are nânğâm nengât kotenje mem agatjetgât bo maktân. Amâ hingât maktân. Luâk bâleje bikje wan me wan ekmai aregâlâk nânğambiâ humo akmap arekje wan me wan biwinenñân tatmap are nânğambiâ gemap. Hain akto yengâlân togomai arekje yengumbiâ amâ nengât pat nânğâm den hâuje makyenjim mem ge kat yekbai aregât yu kulemgoân.

<sup>13</sup> Akto nenŋe ye heronŋe akbaigât hain akmaen. Akto luâk âmbâle bâleŋande nengât den nânġâm hin dâyi, “Woe, Pauloma âmâ sinduk akmai.” hain dâyi. Are amâ hanâk Anutugât âi mem malion aregât nânġâm hain dâyi. Are amâ ukenyenæet. Dâ nen amâ hanâk nânġâ nânġânenŋe hulanŋe agep aregât tân yenġuwerâm Anutugât âiâk mem agatbaen.

<sup>14</sup> Nen hain aktenŋe Kristonŋe okot nânġâ nengim han kalemŋe arekŋe nen goanŋenekto nen hin nânġâm henġemgomaen. Yesuŋe ikinŋe hâknæet bo nânġâm âmâ nengât dosa mem moep sop ainâk nenŋe yâkgât akmâ hainâk moyion.

<sup>15</sup> Yesuŋe luâk âmbâle ukenyenŋe watbâi dâm aregât moep. Mondo Anutuŋe Yesu momonânba goanġo agalep aregât nen hâknŋenæet bo nânġâm manbaen. Âmâ Yesuŋe nengât akmâ moepgât nenŋe yâkgât akmâ manbaengât moep.

<sup>16</sup> Akto ulikŋân nen hânġât pat mem manminionân ain âmâ hânġât nânġâ nânġâ watmâ Kristo âmâ luâk yânŋe dâm nânġâyion. Gârâmâ hinŋe, hain bo nânġâmaen. Luâk âmbâle amâ hânġât nânġâ nânġâgât pat bo nânġâyion.

<sup>17</sup> Âmâ hin. Anutuŋe Kristogât akmâ âmâ irakŋe ketugunenegep. Agak meme tâmbânġande katip nenguep ainba oloŋnenekmâ dâp irakŋân katnegep.

<sup>18</sup> Are amâ Anutu konok yâkŋe nânġâm henġem nengiep arekŋe ulikŋân nengât bâleŋe aregât kuk nengim nanŋe huŋgun anġo gembo kuk are yâkgâlân kato moep aregât kuk are sândugembo nâ olop biwi konok akŋet dâm oloŋ nenegep. Dâ areâk bo. Anutu olop biwi konok akbaengât den

pat makyen̄gimaen aregât den pat nengiep.

<sup>19</sup> Den pat aregât keiñe hin. Anutuñe hin nân̄gâep, “Luâk âmbâle nâ olop biwi konok akbaen.” dâm dosayen̄e puliwiapgât Nan̄ñe huñgun añdo gembo dosanen̄ñe yâkgâlân kato moep. Aregât Kristo dumnenn̄ñân kilepgât den pat luâk âmbâle makyen̄gin̄et dâm maknengiep.

<sup>20</sup> Hain gârâmâ Kristogât akmâ lau lokom kinmâ Yesu nengât moep aregât den makyen̄gimaen amâ hin. Anutu ikin̄jak biwinenn̄ñân kinmâ luâk âmbâle yen̄gonmap aregât ye Korinti gâtñe kulem esen̄ñe ire oyan̄dâi ye den ire nân̄gâm hengen̄gom Kristo amâ nengât akmâ moepgât Anutu olop biwi konok akñet.

<sup>21</sup> Akto Anutuñe dosanen̄ñe bo akto luâk âmbâle âlepñe nengonberâm Yesuñe agak meme bâleñe me dosa bo akmap are mem amâ dosanen̄ñe yâkgâlân kato dosa luâk hain are agep. Yâkñe hain akto ben̄ñe agak meme âlepñe mem malep are nengâlân miawakto Anutuñe nenekto huragumap.

## 6

*Aposoloñe kembugât âi membiâ umatñe siâ siâ miawakyeñgiep.*

<sup>1-2</sup> Akto Anutuñe makto Yesaian̄e kulemgoep bikñe hin tatâp,

“Humonen̄ñe hin dâep, “Nâñe han kalemnaet sopñe miawaktâpgât ulitniñbiâ nân̄gâyengiân. Akto hengen̄goyengiân sopñe miawaktâpgât tânyen̄guân.” dâep.”

are kulemgoep bunje akto Anutuje mem purik katnenekbiapgât sop akto nen Anutu olop den kârikje hin hâwâtyekne. Bâin. Ujak amâ Anutuje hejgem nenguwerâpgât sopje are Anutuje hejgem yejguwerâp are hâkâj akmâ bo panbai. Bo.

<sup>3</sup> Nen luâkje âi meme nenje makmâ sârekowâigât akto âi mendenne nen ekmâ girinjengiwâigât âi ârândâjâk mem amâ luâk âmbâle dop yejân kâwâwâj kârâwâigât bo panmaen.

<sup>4</sup> Bo. Nen Anutugât âi luâk manmaen nen hilâm ârândâj nennjaet agak meme âlepje are mendenne luâk âmbâle hârok nenekbiâ ârândâj agâkgât âi bo memaen. Bo dondâ. Hin miawak nengimbo âi hanâk mendenne nenekbiâ ârândâj akmap. Umatje bâleje dondâ akto âi je humo akto wan me wan hâkoko olowâk are amâ bo hâkâj akmaen.

<sup>5</sup> Akto gasaje bugaje nengumai akto kala busiân kat nenekmai akto ândenengim kot bâleje nengonmai, akto âi humo mem me sot bâlâk manmâ asi je bo yemaen,

<sup>6</sup> arek je miawak nengimbo hanâk dâm âiâk mem agak meme âlepjeâk mem amâ nâjgâ nâjgâ âlepje are memaen. Akto kuk dowâk bo akmaen. Akto luâk âmbâle hârok agak meme âlepje akyejjim hejgemgomaen. Akto Anutugât Heak kârikje arek je meme aknengimbo biwi konok akmâ manmaen.

<sup>7</sup> Den bunjeâk lau elek bo maktenje Anutugât kârikje miawakmap. Hain aktenje luâk âmbâle yânje nenekbiâ ârândâj akmap. Akto areâk bo. Tembe loko je yejguwerâm akmâ unam tâwât

mem arimai nenŋe hainâk bâtnenŋe biken ain agak meme âlepŋe mem Anutugât kârikŋân kinmâ makyenŋimaen.

<sup>8</sup> Akto luâk âmbâle bikŋe agak memenenŋe ekmâ ukenŋe nânŋâm kotnenŋe mem agatmai. Dâ siânbaŋe nenekbiâ bâlimbo kotnenŋe mem ge katmâ den bâleŋe maganŋi nengimai. Akto nengât den bunŋe are siânbaŋe nânŋâm hianŋimai dâmai.

<sup>9</sup> Akto hânân luâk âmbâleŋe bonânŋâ nengimai. Dâ Anutuŋe amâ nânŋâ nengimap. Akto umatŋe humo miawakto bâsok mondenŋe ainâk Anutuŋe meme aknengimbo âlepŋe manmaen. Akto gasalupnenŋande moŋet dâm tâk dâtâ dâtâŋe ore nenekbiâ Anutuŋe damunnenŋe akto bo moyion.

<sup>10</sup> Nen okot umburuk aknenginŋande hanâk biwi kauân manmaen. Umburukŋe hanâk luâk biwirâ henŋemyenŋumaen. Siâ me siâ mesakmaen amâ hanâk unsambe humo olop manmaen.

<sup>11</sup> O galalupne Korinti gâtŋe, nenŋe tek tekŋân makmaen amâ ye okot dondâ akyenŋimaen.

<sup>12</sup> Akto biwinenŋe bo gangerâmaen. Dâ yeŋe âmâ biwiyenŋe gangerâmai aregât nen olop agak memenenŋe konok bo aktâp.

<sup>13</sup> Akto apoŋe nanlupyenŋe makyenŋimai dop hainâk hin makyenŋiwe. Nen agak meme wan me wan ire akyenŋimaen aregât yekâ hainâk nen okot âlep nânŋâ nengiwei.

*Bâleŋe akto âlepŋe gala konok bo akbat.*

<sup>14</sup> O galalupne, ye âmâ luâk âmbâle biwiyenŋe Yesugâlân bo kali are yenŋât agak meme are amâ siânŋe ye yâk olop biwi konok bo akbei. Akto agak meme âlepŋe akto bâleŋe amâ dopyetŋe konok

mon? Akto hilâm hândâk amâ dopyetņe konok mon?

<sup>15</sup> Haingât Kristogât gasa kautņe olop gain gain han konok akbiandat? Me Anutu nânğanmapņe Anutu bo nânğanmap are gain gain ârândâņ akbat. Bo.

<sup>16</sup> Akto nen âmâ Anutugât emet âlepņe hainare akmaen aregât nen me luâk siâņe lâpiogât kotņe mem agatmâ are olop biwi konok bo akmaen. Akto nen âmâ Anutu manman Amboņaet emet âlepņe aregât keņe makbe. Ulikņân Anutuņe makto Propete bikņande hin kulemgoyi,

“Nânğât kâmolân gâtņe ye olop tatmâ hutyeņân bam gutbaen. Akto nâ yeņgât damunyeņe akbian. Akto ye nânğât kâmolân manbai.

<sup>17</sup> Aregât nânğât den bo nânğâniņmai are hep-unyekmâ yeņeâk manbei. Akto siâ me siâ bâleņe are mem bo howaiwai. Bo howaimbiâ âmâ âlepņe meyektere nânğâlân dewatim manbai.

<sup>18</sup> Hain akbiâ nâņe yeņgât Eweyeņe akbian. Akto nâņe ye nan baratlupnerâm yeņgonbian.”  
dâep. Humoņe hain dâep.

## 7

*Pauloņe Korinti yeņgât pat nânğâm biwiņe heroņe agep.*

<sup>1</sup> Galalupne, Anutuņe makmâ kalep ire nânğâm heņgemgom hâknene akto biwinenņaet helen are hepunmâ Anutugât hamep akmâ agak meme âlepņe huragumap are membaen.

<sup>2</sup> Han nânğâ nânğayeņe bo gangerâwei. Nen ulikņânbak luâk âmbâle bo akmâ bâliyion akto bi-wiyeņe bo mem helen akyeņgiyion. Akto siâ me siâ

bo kâmbu meyenjiyon aregât ye nengât nângâm biwiyenande nengât okot âlep nângâwei.

<sup>3</sup> Akto nâ ye hâkyeje tunmâ bo maktân. Bo. Nâ emelâk hin maktân. Nen yengât okot âlep nângâmaen. Aregât umatje miawakto bâsok mombiâ âmâ âlepje nen gai hainâk bâsok mombaen. Akto wan me wan kârikje nângâm heronje akbiâ nen âkâ hainâk heronje akbaen.

<sup>4</sup> Ye biwiyenje Yesugâlân kali hainâk manmâ âgâwai aregât agak memeyenjaet luâk âmbâle makyengim âmâ bo anjun anjiman. Akto nâ umatje hinje miawak ninjo yengât pat nângâm mârune humo nângân aregât biwine sândugemap.

<sup>5</sup> Galalupne, umatje âgâlân miawaknengiep aregât keije makyengire nângâjet. Nen Makedonia hânân ain ari malion. Ain mandenje nengâlân umatje wan me wan dondâ nengâlân miawakto hâknenje bo hutuk âgâep. Akto hâknennân kuk humo miawaknengimbo biwinenje hamep agep.

<sup>6</sup> Hain aktenje Anutunje luâk âmbâle biwiyenje umatje are mem yeukje ketugumap arekje nengât biwinenje sândugeâk dâm Tito hungun anjo togom nengât biwinenje mem giep.

<sup>7</sup> Akto Titonje nengâlân togom yeje gala agani aregât den pat maknengimbo nângâenne biwinenje sândugiep. Akto Tito togom yengât den pat maknengiep amâ hin. Yeje nâ nekberâm kârikje akmâ tatâi akto bâleje agi aregât biwiyenje indiep, akto nângât den amâ âlepnerâm nângât den pat are nângâne dâm magi aregât den pat maknengimbo nângâenne nune biwine sândugiep.

<sup>8</sup> O galalupne, nâ âgâlân yengât kulem esenje

kulemgom katere yengâlân togoep arekne bi-wiyene mem bâlimbo nângâre âlepne agep. Âgâlân kulem esenne pup pup oyanî ainâk kulem esenne arekne biwi umat ketuguyegep aregât nâkai bi-wine umatne agep. Dâ hinne bâleneyene makmâ miawakmâ hepunmâ han biwiyene purik kali aregât nângâm herone aktân.

<sup>9</sup> Akto nâ yengât biwi umat aregât herone bo âgân. Bo. Nen âmâ nângâ nângâylene âlepne agâkgât Yesugât den pat makyengiyion amâ Anutu ikinjak biwi umat ire mem agat yengimbo bâlene yene makmâ miawakmâ hanyene purik kali are nângâm herone akmâ mâruân. Amâ dennenjande bo mem bâliyegepgât.

<sup>10</sup> Akto agak meme iregâlâk Anutune makto umatne miawakmap arekne biwi umat mem miawakto bâlene nenne makmâ miawaktenne Anutune mem hengemgo nenekmap are nângâm biwi umat amâ âlepne dâm nângâmaen. Amâ siân nângâenne bo bâliwiâp. Dâ hângât luâk biwiyene umatne akto bâleneyene bo makmâ miawakbiâ amâ momogât dâp miawak yengimap.

<sup>11</sup> Eknet. Biwi bâle owâinande yengâlân bunne dondâne umalâk mem miawagep arekne wan akyengiep? Arekneak hâwât yekto Anutugât hamep akbiâ biwiyene indembo agatmâ, “Paulo nengâlân togom hengem nenguâk.” dâm den hengemgoyi. Akto arekneak goan yekto luâk bâlene agep are kukdâ anî. Hain akbiâ agak memeyene âmâ tekteknân hain miawakto ârândan agep.

<sup>12</sup> Akto kulem esenne kulemgore oyanî are nâ luâk siâ akmâ bâlimbo aregât bo kulemgoân.

Akto nâ luâk bâleŋe miep aregât bo kulemgôân. Bo. Anutugât dewunŋân yeŋgât hin kulemgôân, yeŋe nengât akmâ biwiyenŋe humo yemap are nâŋgâŋetgât kulemgôân.

<sup>13</sup> Aregât miawagâk dâm kulemgore oyaŋmâ nengât biwinenŋande heronŋe dondâ akto nâŋgâm heronŋe dondâ agion. Heronŋe akmâ biwinenŋe sândugiep.

*Korinti gâtŋande Tito biwi âlep aganŋi.*

Akto areâk bo. Yeŋe Tito gala aganŋbiâ biwiŋe hutuk âgâep. Hain akto Titonŋe hepun yekmâ nengâlân togom den are maknengimbo heronŋe dondâ agion.

<sup>14</sup> Ulikŋân nâŋe Tito maganŋmâ yeŋgât agak meme âlepŋe aregât pat maganŋân. Hain maganŋdere hepun nekmâ yeŋgâlân arimbo yeŋgât agak memeyenŋe maganŋân are bunŋe hainâk akniŋi dâm purik katmâ togom makniŋep. Hain makto nâŋe Tito maganŋân ina bunŋe agep aregât bo aŋun aŋgiân.

<sup>15</sup> Akto Titonŋe yeŋe hârok yâkgât hamep akmâ dowâk launŋe lokoyi aregât nâŋgâm yeŋgât heronŋe dondâ nâŋgâmap.

<sup>16</sup> Aregât yeŋgât keiyenŋe nâŋgâre bunŋe akbi-appgât pat nâŋgâm heronŋe aktân.

## 8

*Makedonia gâtŋande puli kali aregât den.*

<sup>1</sup> Galalupne, hinŋe Anutunŋe ikinŋe kâmot Makedonia hânân manmai are damunyenŋe akto wan me wan miawakyenŋiep aregât den pat makyenŋire nâŋgâŋet.

2-3 Akto âgâlân Makedonia luâk âmbâle biwiyenê Yesugâlân kali are umburuk dondâ mali. Hain akmâ heronê humo agi. Hain akmâ Yesugât kâmot siâ umburuk dondâ mali are yengât den pat nângâm okotyenê nângâyengim tâwât dewunne han owâineâk kârikne yengât dop are ewangim katmâ menduguyi. Hain akbiâ umburuk dondâ miawak yengiep.

4 Hain akto, “Hanâk kepia hârok hain agi aregât nen âkai âi are mem Anutugât kâmot umburuk dondâ mandâi are tân yenguenne ârândân akbiap.” dâm hâwât nenekbiâ yâk yengât wan me wan hârok mem arim yengiyion.

5 Akto nen uliknân hin nângâyion, “Makedonia gâtne umburuk mandâi areyengât wan me wan are getegâk katbai.” dâm nângâyion. Dâ yâk Anutu Humonenne dâmai aregât launenne lokom wan me wan hârok kali.

6 Hainare gârâmâ Tito han kalem âi ire keiñe kalep are goandenne ye hutyenân wan me wan potatmâ kali aregât âi âlepne are mem metewiap.

7 Akto ye agak meme bikne emelâk âlepne dondâ akmai amâ hin. Biwiyenê Anutugâlân katbiâ tato nângâ nângâ yenê emelâk humo akto den pat âlepne makyengimai. Akto Anutugât âi memberâm kârikne dondâ akmâ nen okot nângâ nengim akmai. Akto aregât hainâk agak meme âlepne dondâ akmâ âi ire mem amâ tâwât dewunne katmâ menduguwei.

*Korinti gâtñande puli makmâ hâreyi are mem metenjetgât magep.*

8 Akto yu maktân are den kârikņe katmâ bo hâwâtyektân. Nâ yeņgât han kalem gain gain yendâp akto bikņande Anutugât pat akmâ âi mem manmai aregât keiņe miawagâkgât maktân.

9 Akto areâk bo. Humonenņe Yesu Kristo Eweņe olop manmâ kotņe siâ siâņe hârok dondâ mem malep arekņe okot nâņgâ nengim hanâk dâm hânân gem luâk umburuk hainare akmâ malep. Hain akto âmâ ye siâ siâ dondâ membaigât dâp miawakyeņgiep.

10 Ye hin akbiâ ârândâņ akbiapgât hin nâņgân. Ye hombaņ amukņân tâwât dewunņe nenņe katbaen dâyi aregât hinņe âi are mem metewei.

11 Ulikņân âi iregât ukenņe nâņgâyi aregât ye dop yeņânâk katmâ metembiâ tâwât dewunņe huragumbo umburuk dondâ arekņe membai ain âmâ âiyeņe bo akbiap.

12 Akto ye hain akmâ wan me wan tatyengiâp aregât dopyeņânâk katbiâ Anutuņe agak meme aregât ukenņe nâņgâwiap. Dâ ye wan me wan bo tat yeņgiâp aregât Anutuņe bo hâwât yekto katbai. Dopyeņân katbiâ Anutuņe ekto huraguwiâp.

13 Akto ye wan me wan tatyengiâp a hârok katmâ yeņgimbiâ siânbaņe dondâ akbiâ umatņe miawak yeņgiwiap aregât bo kulengoân. Bo. Ye akto siânbaņe hârok dop konok akbaigât kulengoen.

14 Akto hinņe ye Yesugât kâmot hârok ârândâņâk tatengât nâņgâm uņak yeņe yâk yeņgimbiâ âmâ benņe siân yâkņe wan me wan tân yeņguwai are yeņgimbiâ ye membai. Agak meme ain âmâ ârândâņâk akbai.

15 Akto aregât Anutuņe makto Mosenņe hin

kulemgoep, “Luâk siâ sot dondâ miep are unsambeje bo akto âmâ ârândân agep. Dâ siâ getek miep are gai umburuk bo akmâ âmâ ârândân agep.” Akto den bunje agâkgât ye yengât bikne are mem yenginet.

*Tito akto galalogâtne okot âlep akyenjetgât magep.*

<sup>16</sup> Akto nâje yengât akmâ han kalem nângâyeŋgiân. Anutuŋe dop hainâk okot âlepgât gala tân agu agu aregât âi Titogât biwiŋân totokombo biwiŋe agalep aregât Anutu mepaiŋe mendân.

<sup>17</sup> Aregât gâ ari Korinti gâtne yekben dâm maganŋe âi aregât ukenŋe dondâ nângâep. Aregât Anutugât mepaiŋe mene.

<sup>18</sup> Akto nenŋe galalogâtnenŋe lâuwâ siâ huŋgun yetkire olop ariwai. Siâ amâ Yesugât kâmot hârokne, “Luâk ire den pat âlepne maknengimbo ektenŋe dâtne akmap.” dâmai.

<sup>19</sup> Anutugât kâmotne luâk are yâk âmâ okot kaugât puli mem ariwaigât âi tânnenguâkgât mem kali. Âi are Kembu nânganmâ biwi owâiâk memaen.

<sup>20-21</sup> Akto nen Humonenŋaet dewunŋân âlepne agâkgât konok âi ire bo memaen. Akto luâk âmbâle siâne pei nenekbâigât Anutugât pat dâm puli katmai âi are luâk âmbâle yengât dewunyeŋân mem manmaen. Aregât siâne nenekmâ makmâ sârekowâigât puli humo are ârândânâk yeŋgiwaen.

<sup>22</sup> Haingât galanenŋe siâ yâk olop ariwai yâk âmâ hilâm dondâ âi wan me wan dop koenŋe âi miep are âlepne akmap. Akto hinŋe yâkne âmâ

ye nengât launenŋe dowâk lokomai are yekberâm aktâp.

<sup>23</sup> Akto galane Tito âmâ tân naguep arekŋe tân yeŋgumap. Akto luâk lâuwâ olop ariwai are Yesugât kâmot yâkŋe âi miet dâm huŋgun yetkimbiâ âi membela luâk âmbâle dondâ yelekmâ Kristogât kotŋe mem agatmai.

<sup>24</sup> Aregât yâkŋe ye penâyengimbiân amâ okot âlepġât tân yeŋguwei. Akto yeŋe agak meme âlepŋe memai aregât keiyenŋe yâk makyenġienŋe nânġâyi den are bunŋe agâkgât ye tân yeŋgumbiâ Yesugât kâmot hârokŋe nânġambiâ ârândân akbiâp.

## 9

### *Puli katmâ manġetġât makyenġiep.*

<sup>1-2</sup> Akto nânŋe Yesugât kâmot Makedonia hânân mandâi are hin makyenġiân. Korinti Akaia hânân ġâtŋe hombaŋ ulikŋân tâwât dewunŋe katberâm ukenŋe nânġâyi. Hain dâm makyenġire agak memeyenŋe nânġâm hainâk tâwât dewunŋe katberâm ukenŋe nânġâyi. Aregât yeŋġât biwiyenŋe âi ireġât ukenŋe agâkgât lâuwânŋe bo kulemgowerân.

<sup>3</sup> Ġârâmâ nânŋe Yesugât kâmot Makedonia hânân manmai are hin makyenġiân, Korinti ġâtŋe emelâk wan me wan potatmâ katberâm agi dâm galalupne huŋgun yeŋġire togom agak memeyenŋe yekbai. Yekbiâ nânġât den bunŋe akto heronŋe akbaen are miawagâkgât wan me wan nânġâm heŋgemgowe.

<sup>4</sup> Dâ Makedonia ġâtŋe siâ nâ olop togom yekbiâ bo heŋgem aguwai âmâ nâ gain gain akbaen?

Nâ den magân are bunje bo akbai aregât anjun anjiwaen. Akto yekâ hainâk anjun anjiwai.

<sup>5</sup> Aregât hinje galalupne bikje son hungun yengire yengâlân togom okot âlepât tâwât dewunje katbaen dâm makmâ hâreyi are bunje agâk dâm hâwât yekbai. Hain akmâ puliyenje bikje potatmâ katbiâ talep are haminân nunak yengâlân togom tâwât dewunje yeje emelâk menduguyi are katjet dâre dowâk owâineâk katbai. Hain akbiâ mem arim yengiwian. Are âmâ bo hâwât yekbiangât.

<sup>6</sup> Hin nângâyengiwegât maktân. Luâk siâ âigât hâkân akmâ siâ getegâk kâmetmâ âmâ sot bunje yendoân getek mem manbiap. Dâ luâk siâne âi kalam umatje manbiapje bunje sopjân umatjeâk mem nembiap.

<sup>7</sup> Akto ye siâkâ siâkâ ikinjeâk ikinjeâk biwiyenân nângâm hengemgowe. Aregât yeje yengâlân bikje bo hâwât yekbai. Anutuje luâk âmâle yengiwagât ukenje nângâmai are okot âlep akmâ tân yengumap. Aregât bo hâwât yekbiâ siâkâ ikinjak ikinjak ukenje nângâm katbei.

<sup>8</sup> Akto Anutuje han kalemjaet akmâ wan me wan yengimbo mem sambelem manbai aregât hinje hilâm ârândân wan me wan yengâlân tatâp are potatmâ bikjeâk âi âlepje siâ yengiwagât âiyenje âlepje sambelewiap. Are miawagâkgât Anutuje bo pâpkomap.

<sup>9</sup> Aregât keije Anutuje makto luâk siâne hin kulengoep,

“Luâk âmâle bikjande sot me wan me wan yengimbiâ âmâ Anutuje agak meme âlepjaet

meme akyenjimbo agak meme âlepne akmâ âgâm manbai.” hain kulemgoeop.

<sup>10</sup> Anutuŋe han kalem akmâ kalam amboŋe alekŋe waŋmap me sot bunŋe me wan me wan ak-nengimap arekŋe yekai âi kalam kâmetgât alekŋe peniaŋmâ yengim yengât agak meme âlepne sam-beleâk dâm meme akyenjimbo

<sup>11</sup> hokboâk hokboâk han kalem akmâ wan me wan potatmâ katbiâ tato are nenŋe mem Anu-tugât kâmot umburuk are yengienŋe mem âlepne manmâ Anutu okot âlep aganmâ mepai meanbai.

<sup>12</sup> Galama, yeŋe Anutugât kâmot wan me wan bo tatyenŋiâp are yengimbiâ âiyeŋe ârândân aktâp. Gârâmâ areâk bo. Yengiyiân ain bikŋande agak memeyeŋe ekmâ Anutu mepaiŋe mem manbiâ Anutu gâlân ârândân akmâ âgâwiap.

<sup>13</sup> Hain akto ye Kristogât den pat âlep bo heam-bukmaigât laŋe lokomai. Aregât keiŋe han kalem yeŋande mem miawakto Yerusalem kepia gâtŋe akto Yesugât kâmot bikŋe hârok yengât han kalam agak memeyeŋe ekmâ Anutu mepaiŋe mem heronŋe aganbai.

<sup>14</sup> Hain akmâ Anutuŋe yengât han kalem ewangimapŋe damunyeŋe akmapgât ekmâ han biwiyeŋande hikoyekmâ kinmâ yengât akmâ Anutu ulilanbai.

<sup>15</sup> Galama, Anutu han kalemŋe are gain gain makmâ miawakbaen? Aregât hanâk yei dâm mepaiŋe mem maganmâ âgâwaen.

## 10

*Anutugât tembe saut lokom yengumaen.*

1 O galalupne, Kristone amâ lumbe yeukne akyengimbo yâkgât wâtjân kinmâ yeukne akyengiman. Aregât yengât bikjande hin dâyi, “Woe, Paulo amâ han lâuwâ akmâ togom benne yeukne aknengimap. Dâ kâlewângen manmâ amâ peinenekmâ kulengoep.”

2 Aregât siân togom peiyekbian. Dâ den are bo agâk dâm amâ dowâk agak memeyene hengemgowe. Hain bo akbiâ amâ luâk bikjande, “Pauloma amâ hângât nângâ nângâ watmai.” dâyi aregât denyene kom miwindik yekbian.

3 Akto nenne hânân bam gutmaen. Dâ amâ hângât luâkne agumai hain bo agumaen.

4 Akto hângât luâk tembe saut lokom yengumai. Dâ nen amâ hain bo akmaen. Nen amâ Anutugât wâtjân kinmâ Bâlene Amboene akto yâkgât sinduk baniara are yenguwêrâm manmaen.

5 Aregât arim luâk bikne Anutugât bo nângâ anberâm akmai are arim makyengiennene nângâm ukenne bo akmai. Akto pâlâmne akmai. Akto luâk bikne Anutugât hâkân akmâ Anutugât den bo lokomai are agak meme âlepne aknet dâm âi humo mem hâwât yekmâ makyengimaen. Amâ luâk âmbâle bikjande hângâlâk nângâmai are Kristone damunylene agâkgât makyengimaen.

6 Akto yengâlân gâtne bikjande hinne launenne bo lokomai arekne kulem esenne ire oyanmâ agak meme âlepne akbai. Dâ bikjande den nenne hâkân akmâ hângâlâk nângâm manmâ âgâwai are nenne togom den makyengim miwindik yekbaen.

*Luâk bikjande Paulogât nângâmbiâ giep.*

<sup>7</sup> Wan me wan siâ yu miawaktâp are ekñet. Akto yeñgâlân gâtñe bikñande hin dâyi, “Kristoñe emelâk damunnenñe akmap.” dâyi. Luâk hain dâyi are hin makyenñe nâñgâñet. Kristoñe ye damunyeñe akmap hainâk nen damun nenñe akmap.

<sup>8</sup> Akto areâk bo. Humoñe hin maknengiep, “Korinti gâtñe nâñgât hârogâk nâñgâwai.” dâm damun akñetgât âi nengiep. Akto gulip akyenñe dâm bo nengiep. Akto nâñgât âi aregât âi mendere Anutuñe ekto ârândân akmap aregât kotne bo mem ge katbei. Akto bo anun anñiân.

<sup>9</sup> Gârâmâ kulemgore ekmâ hamewakñetgât yu bo kulengoân. Bo.

<sup>10</sup> Akto yeñgâlân gâtñe bikñande nâñgâ yâkgât hin dâyi, “Woe, Pauloñe den umatñe kulem esenñân kulemgom kato oyanñe dâtñe akmap. Dâ ikinak togom maknengimbo âmâ den are nâñgâenñe âmâ yeukñe akmâ yânñe akmap.” nâñgât hain dâyi.

<sup>11</sup> Aregât siân yeñgâlân togowianân âmâ den umatñe kulem esenñân kulengoân are hainâk launân makyenñe nâñgâmbiâ dâtñe akto hamep akbai.

<sup>12</sup> Akto yeñe hin akmai. Ye yeñe dopyenñânâk manmai. Yeñgâlân gâtñe konokñe amâ siâgât nâñgâm agak meme are dop agumap. Hain akmâ kotyeñe mem agatmâ yeñe nâñgâ anñimbiâ humo akmap. Aregât ye sinduk akmai nâñgân. Dâ nen âmâ hain bo akmaen akto nen yeñgât dop bo memaen.

<sup>13</sup> Akto nenñe dop horat aregenâk arim makyenñe. Nen Anutuñe âi nengiep aregâlâk

nângâm ari makyengimaen. Anutuņe âi are âmâ hânņe hânņe hârok potatmâ nengiep. Ain horalân makyengimaen. Akto hainâk ye makyengiwaen aregât âi nengiep. Gârâmâ aregât kotnenņe bo mem agatmaen.

<sup>14</sup> Ulikņân dowâk Anutugât lauņe lokom kâlewângenba dowâk yengâlân togom makyengienniņe Yesugât keiņe pup pup nângâyi aregât âi memaengât hâk mem agat agatgât den bo makmâ sambelemaen. Dâ togom bo makyengiân dâine dennenniņe bunņe bo akbop.

<sup>15</sup> Gârâmâ âi are bo mem meteyion aregât luâk bikņande âi mem meteyi yâk yengât âiân hanâk watmâ kinmâ aregât hâknenņe bo mem agatmaen. Bo. Ye hanyenande Yesu Kristo nânganmâ kepilâm âgâmbiâ âmâ benņe yengât akmâ âinenņe mendenņe humolem âgâkgât bundâk hannenniņe aregât kindo manmaen.

<sup>16</sup> Aregât luâk âmbâle hamiyenângen manmai yâk yengâlân den pat âlep makmâ ariwaen. Dâ luâk siâgât âi bunņe mem kinmâ mem metiep aregât âgâ âgâņe bo akbaen.

<sup>17</sup> Aregât keiņe Anutugât kulemņe hin maktâp, “Luâk siâ egâlian den makmâ âgâ âgâņe akberâm âmâ benņe Kembugât akmâ âgâ âgâgât makbiâp.”

<sup>18</sup> Akto areâk bo. Luâk âmbâle yeņaet kotyene mem agatbai are amâ Anutuņe luâk âmbâle yânņe dâm yekto gemap. Dâ Humoņe luâk âmbâle bikņe meyekmap are âmâ Humoņe yekmâ luâk âmbâle âlepņe dâm yekto huragumap.

*Pauloŋe ikiye keiŋe makyenŋiep.*

<sup>1</sup> O galalupne, luâk yengâlai togom kotyene mem agatmai are yengât makyenŋiwe. Yâkne nângât kotne mem ge katmai aregât nunaet keine makyenŋire yeŋe nângâm yâk yengât keiyene nângâmbiâ yânŋe akbiâp. Dâ keine maktere nângâ yâkgât sinduk akmap dâwai amâ hanâk makbe.

<sup>2</sup> Anutuŋe yengât okot akmâ nângâ nângâne humo katmâ nângâlân togonet dâm yengonmap. Agak meme aregât dâm nâne yengât nângâmâk akman aregât luâk siâne ikiye âmbâle dâtâne âlepŋe memberâm nângâmap dop hainâk ye Kristogât dâtâne aregât meygâk dâm âi yengât hutyenân âi mem hâk hilâlâm kakŋân malân.

<sup>3</sup> Gârâmâ ulikŋân niambi mulum humo arekŋe yoŋâk togom Ewa hianŋiep dop hainâk luâk hinŋe yengâlân togoyi arekŋe agak memeyeŋe âlepŋe are akto Kristo okot âlep aganmâ denŋe lokom kinmai are gulip komberâm nângâ nângâyeŋe akto han biwiyeŋe heyenŋiwerâm akmai are nângâre biwine dondâ bâliâp.

<sup>4</sup> Akto luâk arekŋe Yesugât keiŋe makyenŋimai aregât hâkân akmâ Yesu siâgât den makyenŋim amâ Anutugât Heak kârikŋande kautyenân miep aregât wâtŋân bo kinmâ hianŋi den makyenŋimbiâ dowâk nângâyi. Den pat are nângâre umatŋe humo miawaktâp.

<sup>5</sup> O galalupne, hianŋi luâk arekŋe hin dâmai, “Nen amâ Aposolo hârok ewangi yekmaen.” dâmai aregât nâ Aposolo ire amukyengân bo manman aten.

<sup>6</sup> Nâmâ den makmakgât keiŋe siâne bo hekatniŋdo makman. Gârâmâ nângâ nângâne amâ

âlepñe. Aregât keñje hin me hain makyenjienne nângâm meteyi.

<sup>7</sup> Dâ nâñe yengâlân togom Anutugât keñje makyenjiân ainâk ye wan me wangât bo ulit yengiân. Ye umatñân manbâi dâm yân togom makyenjiân. Aregât yeñe nângât nângâniñbiâ geâp mon?

<sup>8</sup> Bo. Nâmâ tânyenjuwerâm âmâ Yesugât kâmotñe siângen manmai yâk ulityenjienne niñbiâ are mem manmâ ye makyenjiyon.

<sup>9</sup> Akto hutyenân mandere ain siâ me siâgât umburukñe akniñdoân âmâ umatñe bo yengiân. Bo. Yesugât kâmot Makedonia hânân manmai arekñe togom wan me wan niñi. Aregât umat bo yengire âmâ owâiñân mali. Nâ hain agân aregât nângâre âlepñe aktâpât hain akbian.

<sup>10</sup> Aregât den pat yengâlân sambeleâk dâm akto Akaia hânân hainâk sambeleâk dâm Kristo dewunñân kinmâ Paulo bunñe maktâp dâñetgât ya kulengoân.

<sup>11</sup> Aregât keñje amâ nâñe okot bo nângâyengim kotne mem agatman me? Hain bo. Nâñe Anutugât dewunñân kinmâ hain dâm okot dondâ nângâ yengiman.

<sup>12</sup> Akto hiangi luâk arekñe yeñæet nângangimbiâ humo akto hin dâmai, “Anutuñe Pauloma wâtñe akyengimbo âi memai hainâk nen gai wâtñe aknengimbo âi memaen.” hain dâmai arewa den hiangi miawakto nângâñet dâm nunaet keine kulemgom metewe.

<sup>13</sup> Hiangi luâk are âmâ Aposolo nengâlân gâtñe bo. Yâkñe nen Aposolo âi memaen dâm hiangim âi hanâk hanâk mem hiangim Kristogât âi dâmai.

14 Akto Niambi hainâk akmâ henengiwerâm ikinjaet hâkne mem purik katmâ anjelo pagalenje amboñe hainare akmap.

15 Aregât Niambigât âi luâk hâkyeñe mem purik dâm, “Nen agak meme âlepñeâk akmaen.” dâm hianjim hainâk akmâ heyengiwerâm akmai. Hain akmai aregât hâmbâi Anutuñe wan me wan memai aregât agak memeyeñe dopyeñân akyeñgiwiap.

*Paulogât kakñân umatñe humo miawagep.*

16 Maktân aregât gaetñe maktere nângât den are nângâmbiâ nâ luâk kopa hin are bo akbian. Dâ hanâk makberâm âmâ keine mem miawaktere nângâniñbiâ hâknaet bâlensiâ makmâ mem agatbe.

17 Dâ den ire makberân âmâ Kembangât lau bo makberân. Nunaet hâknaet mem agat agat gât hanâk sinduk denñe hainare makberân.

18 Luâk dondâne hângât nângâ nângâyeñe watmâ hâk mem agat agat den makmaigât nâ hainâk yu makberân.

19 Yeñe nângâ nângâyeñe nângâmbiâ humo akmapgât hianji luâk yeñgâlân togomai are dowâk nângâ yeñjim mañgan yekmai. Aregât nâ hainâk den hembalik makyeñgire dowâk mañgan nekbai me?

20 Akto siâne togom âi yeñjim hâkânyeñe akmâ ondopyeñe hogom yeñgât nângâmbiâ gembo bâleñe akyeñgimbiâ âmâ yeñe âlepñe dâm mañgan yekmai.

21 Akto nâmâ yeukñe akmâ mañgan yekman aregât hâkân akmâ heniñmai. Âlepñe nâ hainâk kotne mem agatmâ makyeñgire dowâk nângâ

niŋbai me? Hiangi luâk are wan me wan akmâ manmai. Nâkai hainâk akbom.

<sup>22</sup> Yâk, “Nen âmâ Yuda gâtŋe kotnenŋe siâ Hebraioâk tiŋ tiŋ dâm makmaen.” dâmai. Akto nâkai hainâk Hebraio yengâlân gâtŋe. Akto yâk, “Nen âmâ Israegât hakulupŋe.” dâmai nâkai hainâk makman. Akto yâk, “Nen âmâ Abrahamgât hakulupŋe manden.” dâmai nâkai hainâk manman.

<sup>23</sup> Yâk, “Nen âmâ Kristogât âi luâk akmaen.” dâmai. Benŋe aregât nâkai hain akmâ hin makman, “Kristogât âiân nâŋe hârok yâk ewangiyekman.” hain makman amâ nune ukennaet bo maktân. Yeŋe hâwât nekbiâ aregât sinduk akmai hain akmâ maktân. Akto areâk bo. Âi humo mem ewangiyekman. Akto âi iregât kala busi kâlegen katnekbiâ bo yeugemiân aregât nâŋe ewangiyekman. Luâk dondâŋe bugâŋe nugumbiâ momberâm akman.

<sup>24</sup> Akto Yuda luâk yengât humomolupyenande tâk dâtâ dâtâŋe haminân orem orem pan nekbiâ sop 39 agep a haminân hainâk hainâk akbiâ momerâk agep.

<sup>25</sup> Akto sop âlâwu bugâ meân. Akto siân kâtŋe panmâ nuguyi. Akto sop âlâwu arim arim makyenŋiân sop ain haruân wanŋa bâlimbo haruân geân. Akto aregât hutŋân hilâm konok akto hândâk konok haru kakŋân bam gutmâ malân.

<sup>26</sup> Akto hilâm dondâ dâp kâlewângen manmâ togoân. Akto tu humo hâtikoân ain âmâ bo akberâm agân akto dâwân mandere luâk kâmburâ bâleŋande nuguwerâm akbiâ nâŋgâyekmâ malân. Akto nâŋgât kâmolân Yuda luâk galalupnande mem bâli nekberâm agi. Akto Yuda luâk bo arekŋe

mem bâli nekberâm agi. Akto kepia humoân âgâre hainâk kepia humoņe mem bâli nekberâm agi. Akto kepia hepunmâ hân pumângen arire ainâk luâk bikņande mem bâli nekberâm agi. Akto haru hâtikore ainâk bâleņe miawakniņep. Akto luâk bikņande nen Yesugât kâmolân gâtņe dâm heniņbiâ mem maņgan yektere ainâk mem bâli nekberâm agi.

<sup>27</sup> Akto areâk bo. Âi humo mem hâk hilâlâm dondâ nâņgâm hândâk âi mem asiņ âlepņe bo yem sotgât mopne agu agu tatminiân. Akto tugât momberâm agân. Akto seru niņdo hâk pekegât umburuk agân.

<sup>28</sup> Akto areâk bo. Hilâm ârândâņ luâk âmbâle Yesugâlân biwiyene kali are nâņgâ nâņgâyeņe bâliwop dâm damunyeņe akberâm hanokoakmâ nâņgâmâk dondâ nâņgân. Akto âi humo meân.

<sup>29</sup> Hain akmâ Yesugât kâmolân gâtņe siâņe yeukņe akto nâkai yâkgât pat nâņgâre biwine gemap. Me Niambiņe siâ biwiņe oloņdo dosa akto benņe nâ biwine umatņe dondâ akto nâņgân.

<sup>30</sup> Akto nâ aregât wan arekņæetne makmâ humolewian? Manmanne yeukņe miawagâkgât âlepņe maktere ârândâņ akbiap.

<sup>31</sup> Akto Anutu Humonenņe Yesu aregât Eweņe kotņe tatmâ âgâwiap yâkgât kotņe mem agatne yâk âmâ nâ bo hiaņgiân nâņgâp.

<sup>32</sup> Akto wan siâņe nâņgât yeukņe miawakniņep aregât makbe. Ire ulikņân Damasko kepia âgân. Âgâm kindere luâk kotdâ siâ kotņe Areta yâkgât kiap akto tembe lokolupņe dâp kautņân kinmâ mem nuguwerâm agi.

33 Hain akbiâ nângâm Yesugât kâmolân gâtņe bikņande hândâgân haka humoân lugunekmâ kâtņe haot humo ketugumai are dâpņânba tâk ulikņân yaiwâk mem pan nekbiâ gem gem ge kinmâ haka kâlegenba agatmâ kinmâ âlepņe pârigim arire kiapgât tembe lokolupņande bo menegi.

## 12

*Anutuņe ulikņân Paulo kulem hekalanđo ekto dâtņe agep aregât magep.*

<sup>1</sup> O galalupne, ye wan den maganđi niņmai are nângân. Aregât ye hinņe nângât den pat bunņe nângâņetgât hin makbe. Maktere âmâ âlepņe bo tân nuguwerâp. Akto aregât ukenņe bo nângâman gârâmâ hanâk Humonenņande wan me wan heambukmâ kalep are hekat niņep are makyenđire nângâņet.

<sup>2</sup> Nâ unak gemân hombanđ 14 bo akto Anutugât himbim kâlegen ain âgân. Akto nâ hâkne olop âgân me otnenande âgân âmâ bo nângân. Anutuņe konok nângâp.

<sup>3</sup> Nâ hâkne olop âgân me otnenande âgân âmâ bo nângân. Anutuņe konok nângâp.

<sup>4</sup> Anutuņe wan hekat niņdo me wan me wan nângân are âmâ kâmbokņe donđâ luâkņe bo makmai are nângân.

<sup>5</sup> Ya maktân luâk are yâkgât akmâ maktere ârândâņ akmap. Gârâmâ nunaet bo maktere humo akmap. Bo. Yeukņene maktere sambelem ariâk dâm makman.

6 Dâ kotne mem agatman dâine ârândâŋ akbop. Akto luâk kopaje bo akbom. Akmâ nâŋgât nâŋgâmbiâ âgâ âgâŋe dondâ akbopgât aregât bo akbian. Wan me wan akmâ mendere ekmâ nâŋgâm heŋgemgowai areâk yembiâp.

*Paulogât hâknân dâtŋe metŋe siâ miawagep.*

7 Akto Anutuŋe wan me wan hekat niŋep are nune kotne mem agatbomgât makto Hiaŋgi Amboŋaet hoŋ bawa siâŋe hâknân hâk hilâlâm niŋmâ dop nugumbo nâŋgâre umatŋe agep.

8 Umatŋe are miawak niŋdo Humone hin ulilaŋân. Hâknân ire watmenâ ariâk dâm ulilaŋân.

9 Ulilaŋdere âlâwu akto hin makniŋep, “Luâk âmbâle yeŋgât kârikŋeyeŋe bo tatyengimap ainâk nâŋgât kârikŋe âlepŋe miawak yeŋgimbo ârândâŋ akbiap. Aregât hinŋe han kalemŋe damunge akmangât nâŋgâmenâ ârândâŋ agâk.” dâm makniŋep. Aregât kârikŋene bo tatniŋdâp aregât nâŋgâre âlepŋe aktâp. Kristogât kârikŋande tân nuguâkgât nâŋgân.

10 Kârikŋene bo tatniŋdâp me luâk âmbâle nâŋgât makmâ bâlimai me umatŋe miawaktâp me gasa siâŋe mem bâlinekmai me wan me wan arekŋe gulip nuguwerâmbo ainâk kârikŋene bo are miawakbopgât Kristoŋe dowâk tân nugumap are nâŋgâm herone humo akman.

*Pauloŋe Korinti luâk âmbâle yeŋgât hanoko agep.*

11 Den yu maktân ire âmâ sinduk akmâ hinare maktân. Amâ yeŋe goaŋ nekbiâ makmâ hilipkoân. Hiaŋgi luâk yeŋgâlân togoyi are âmâ yâŋŋe gârâmâ ewangiyekman. Akto nâŋe yâk yeŋgât

amuk yeñân bo mandân aregât yeñe nângât kotne mem agali dâine ârândân akbop.

<sup>12</sup> Akto Aposologât tirip kulem dondâ hutyeñân mem manmâ bo hâkâñe agân are negi.

<sup>13</sup> Aregât wangât Yesugât kâmot bikñe yekbiâ âgâambo yeñgât nângâmbiâ giep? Dâ ire konok bo akyeñgire nângâmbiâ bâliâp mon? Umatyeñgiwomgât bo ulityeñgiân are nângâmbiâ âlepñe agâk.

<sup>14</sup> O galalupne, nâ hinñe yeñgâlân âlâwunje togowian. Togom âmâ puli me sot me wan me wan niññet dâm âmâ bo ulityeñgiwian. Akto nanañ lepat arekñe ewe memelupyene bo damunyeñe akmai. Dâ ewe memelupyenande âmâ nanañlupyene damunyeñe akmai aregât dopñe watmâ hain togom yeñgât tâwât dewunñe me sot wan me wan aregât bo ulit yeñgiwian. Bo. Nâ okotyene nângâ niññetgât egâlianñbian.

<sup>15</sup> Akto nâñe tân yeñguwangât hanâk hanâk nângât wan me wan bo akbiapgât ukennje nângân. Me yeñgât nângâm âlepñe manbaigât âi mem manmâ mombiangât aregât hamep bo akman. Hain akmâ nâñe ye biwinande dondâ nângâ yeñgiman aregât wangât yekâ bâlensiâ nângât han kalem akmâ nângâniñdâi?

<sup>16</sup> Akto yeñgâlân gâtñe bikñe nângâ yâkgât hin dâmai, “Pauloñe amâ bundâk bo ulit nengimap gârâmâ Anutugât pat dâm puli katbiâ mem arim yeñgiwian dâm henengimbo wañdenñe ikinje miep.” dâm hianñimai.

<sup>17</sup> Hain dâmai aregât hin nângâm heñgemgoweï. Nâñe luâk bikñe huñgun yeñgire yeñgâlân togoyi

arekne amâ Paulo siâ siâ wanjet dâm ulit yengimai me bo? Bo.

<sup>18</sup> Amâ Tito yengâlân togoâkgât hâwâtmâ maganân. Maganmâ amâ galanenne siâ hunjunañdere olop oloñ akmâ togoyiat. Togom amâ Titone siâ me siâ ulityengim meyenjep mon? Net Heak konok akto dâp konok bo manmaet mon?

<sup>19</sup> Me den makmaen are nângâm gambiâ amâ kotnenne gewopgât akmap mon? Aregât hain bo. Nen Kristogât akmâ Anutugât dewunñân den makmaen. Hain makmâ amâ galama yengât akmâ tânyengunegât akmâ den makmaen.

<sup>20</sup> Galalupne, nâ yengâlân togom wan me wan memai are mem miawakbiangât hamep akmâ anun anjiwian. Akto nâne togom wan me wan akmai are bo akjet dâre nângâmbiâ umatne akbiap. Nâ togo ye wan akbai are mem miawakbian me? Den kuk akmai me galagât egâlianmai me ye yenaelâk nângâmbiâ humo akmap me ye siâgât haminângen makmai me kotyene mem agatmai me agak meme gulip akmai. Nâ togore hain akbiâ nângâre umatne akbiap aregât yengâlân togowerâm hamep aktân.

<sup>21</sup> Akto nâne yengâlân togom yengâlân gâtne bikñande agak meme bâlene akmâ egâlian bâlene akmâ dâp gulip akmini arekne agak memeyene bo makmâ miawakmâ amâ hanyene bo purik katmai are nângâm Anutune hâwât nekto indem manmâ âgâwian. Aregât anun anjiwom.

## 13

*Paulone bâliwâigât kârikne kenunju yegep.*

<sup>1</sup> Galalupne, nâ unjak âlâwuņe yeņgâlân togow-erâm aktân. Togowian ain âmâ luâk siâ denân katberâm akbiâ âmâ luâk lâuwâ me âlâwu arekņe den are makņiņbiâ âmâ den potatbian. Dâ luâk konokgât bo.

<sup>2</sup> Akto yeņgâlân lâuwâņe togoânân âmâ luâk âmbâle bâleņe agi akto âlepņe akmai are hârok amâ den kârikņe makyeņgiân. Akto hinņe kulem esenņe iren den kârikņe hainâk makyeņgiân. Nâ togowianân âmâ makmâ miwindik yektere anjun anġiwai.

<sup>3</sup> Akto ye âmâ han lâuwâ akmâ hin dâmai, “Paulo amâ Kristogât den makmap me bo?” hain dâm nâņgâm heņgemgowerâm aktâi aregât makmâ miwindik yektere nâņgâm Kristogât kârikņe nâņgâmbiâ dâtņe akbiap. Akto aregât Kristo âmâ yeukņeâk bo akņiņmap. Aregât yeņgâlân togore ikinņe kârikņe miawak yeņgiwiap.

<sup>4</sup> Akto bundâk Yesuņe ulikņân âmâ kârikņe bo akto lâwinân kombiâ moep. Amâ benņe Anutugât kârikņân golâ akmâ agatmâ manmap. Aregât nen yâkņe agep hainâk nenâkai yâkgât hoņlupne kârikņe nenņe bo akto yeņgâlân togom Anutugât kârikņân kinmâ Kristo olop manmâ tânyeņguwai are makmâ miwindikyektenņe dondâ anjun anġiwai.

<sup>5</sup> Akto yekâ yeņeak hilâm ârândânġ biwiyenņe dopkom nâņgâm heņgemgowe. Akto ye Humogâlân biwiyenņe kârikņe katâi me bo? Yeņeâk mem potalakbei. Akto siâņe biwiņe Yesugâlân bo kalî are Yesu Kristo olop bo manmap.

<sup>6</sup> Nen âmâ Anutu bo nâņganġmai dopyenņe konok bo nâņgânġetgât egâlîanġman.

<sup>7</sup> Anutuņe damunyene akto bâleņe bo akņetgât ulilaņmâ manmaen. Nen nenekbiâ Anutugât kâmot bunņe akbaen me bo? Aregât bo makmaen. Ye Anutugât den lokombiâ ârândâņ agâkgât makmaen.

<sup>8</sup> Amâ nen den bunņe gasa gain gain agaņbaen? Gala agaņbaengât dâp areâk tatâp.

<sup>9</sup> Akto nen tân yeņgum yeukņe aktenņe kârikņe akbai aregât nen herone akmaen. Akto ye Anutugât dewunņân salek salek kinmâ âgâwaigât Anutu ulilaņmaen.

<sup>10</sup> Nâ yeņgâlân togom metņe akyeņgiwomgât kâlewângen manmâ sami den yu kulemgoyeņgiân. Kembuņe kârikņe niņep arekņe itiņ gulam yeņgiwiangât bo niņep. Amâ hingât. Ye mem kârikņe ketugu akyeņgiwiangât niņep.

### *Den bâiņe.*

<sup>11</sup> O galalupne, nâ bâiņe makbe. Ye âi mem agak meme âlepņe dondâ are menegât egâlianmâ kautyene orewei. Ye nâņgât kulem esenņe ire oyaņmâ heņgemgowej. Akto ye biwi konok manbei. Akto kuk heņgân bo akbei. Hain akbai âmâ Anutu nâņgâ nâņgâ amboņe akto kambiamnenņe sându geâkgât meme aknengimap arekņe damunyene akmâ ye olop tatmâ âgâwiap.

<sup>12</sup> Akto nâ yeņgât nâņgân aregât ye konok konok hârok magaņgi goaņgi akmâ bâtyeņe koaņgiwei.

<sup>13</sup> Akto Yesugât kâmolân gâtņe kepiane kepiane manmai arekņe yeņgât nâņgâm herone akmai aregât den pat ire ye nâņgâwai dâm hâwât nekbiâ yu kulengoân.

<sup>14</sup> Kambu Yesu Kristo yâkgât han kalem âlepŋe akto Anutugât han kalem akto Heakgât limbâp are yeŋgâlân yem âgâwiâp.

**Yusugât Pat Âlep Den**  
**The New Testament in the Timbe Language of Papua**  
**New Guinea**  
**Nupela Testamen long tokples Timbe long Niugini**

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 28 Dec 2024 from source files dated 31 Aug 2023

03f82704-6ad1-5094-a78e-e240d9f2d4f8